

Christian Fürchtegott Gellert,  
La kamparano kaj lia filo

*tradukita de Hans Erik Jensen*

Johano, juna kamparan'  
post eksterlanda por la san'  
vojaĝo kun nobela fil'  
al sia patra domicil'  
revenis kaj en la vilaĝ'  
fieris li pro la vojaĝ';  
por ĉies ĝoj' rakontis li  
pri eksterlando pli kaj pli.  
Sed kvankam parto estis ver',  
mensog' abundis sen moder'.  
Vojaĝo du kapablojn donas:  
Mensogas ni kaj fanfaronas!  
Ne malpli lerte Hans mensogis  
ol besto kuras, birdo flugis.  
Monato pasis, tiam li  
pro certa grava komisi'  
de l'patro nun en kompani'  
promenis al la urb' kun li.  
Foriris ili en maten'

...

kaj vidis hundon dum promen'.  
Feliĉe ligis ĝin kateno,  
minacis ĝi kun mordmieno.  
"Jen monstro!" diris Frederik'  
por ĝia bruo kaj mimik'.  
"Ho, bagatel'!" respondis Hans,  
"pasintan jaron fore trans  
la lim' mi grandan hundon vidis,  
kaj vere mi pro ĝi ne ridis!  
Mi ĉe Stetino ĝin renkontis;  
ektimis mi, sed ĝin alfrontis!  
Stetino - eble kredas vi:  
al Kopenhag' egalas ĝi,  
Ho ne! al mi nur fidu vi -  
dekoble granda, eble pli!  
La hundo, kiun vidis mi -  
al mia vorto kredu vi -  
almenaŭ estis - ho, fatal'! -  
egale granda kun ĉeval'!"  
De l'patro sonis la respond':  
"Mirinde - kvankam en la mond'  
tre strangajn aĵojn vidas ni;  
okulon propran fidas ni  
apenaŭ - ankaŭ same pri rakont'.  
Ekzemple venos baldaŭ ni al pont'.  
Ni ĝin atingos post malpli ol hor'

...

- al ni neevitebla koridor'.  
 Sur ĝi troviĝas granda ŝton';  
 al ni ĝi rompas kruron sen pardon',  
 se ni mensogis dum la tag' -  
 jen vero - kaj neniel blag'!"  
 Aŭdinte tion tuj la fil'  
 ektimis kaj pro maltrankvil'  
 la sango kuris al la kap',  
 li ŝvitis pro angora frap'.  
 Li kriis: "Paĉjo, kara vi,  
 tro forte ne rapidu ni!  
 Por maljunulo la veter'  
 tre varma estas ja danĝer'!  
 La forton oni devas ŝpari  
 kaj pripensadi, kion fari.  
 Se pri la hundo pensas mi,  
 ne tiom granda estis ĝi,  
 kiom rakontis mi al vi,  
 sed certe estis ĝi malpli -  
 egaligis eble kun bovin',  
 sed tamen hundo de kulmin'!"  
 Denove ili laŭ la voj'  
 iradis, sed sen granda ĝoj',  
 ĉar la junulon la rakont'  
 maltrankviligis, kaj la pont'  
 konfuzon faris pli kaj pli,  
 kaj pro la timo cedis li;  
 ni ĉiuj ja volonte savas  
 la krurojn, se ni sanajn havas.  
 Johano tial pro la krur'  
 elkriis: "Paĉjo, vorton nur!  
 Mi pensas daŭro pri la hundo,  
 sed pro la vero ĝis la fundo  
 mi diras al vi en konfid':  
 Egaligis ĝi nur kun bovid'."

Sed baldaŭ en la horizont'  
videbla estis nun la pont'.  
Por timo fluis al Johan'  
laŭ lia haŭto ŝvitfontan'.  
Nun kaptis li pro la efiko  
la patron forte je l'maniko,  
kaj kriis li en malespero: +  
"Ho, paĉjo, nun mi en sincero  
onfesas, ke mi ŝercis nur;  
kaj tio, kion por plezur'  
rakontis pri la hundo mi,  
ja estis nura fantazi'.  
Similis ĝi ja laŭ la ver'  
la hundojn sur la hejma ter'."

Transpasis ili sen danĝer'  
la ponton de mensog' kaj ver'.  
La fil' ne pro la fanfaron'  
la kruron romp'is sur la ŝton'.  
Sed velkis lia fantazi',  
kaj ĉe la vero restis li.  
Li ne similis plu al dando  
estinta en la eksterlando.

...

*Traduko de la Germana poemo “Der Bauer und sein Sohn” de CHRISTIAN FÜRCHTEGOTT GELLERT (Kristiano Timodio Gelerto, \*1715-07.04 – †1769-12-12) en Esperanton de HANS ERIK JENSEN (†1973-06-18) en 1951-06-07.*

*Arg-536-1072 (2013-02-10 19:30:56)*

*Tiu ĉi traduko estis publikigita en la revuo “Monataj Informoj” de Silkeborg Esperantoforening (Danujo).*